



焦太史編輯國朝獻徵錄卷之九十五目錄

山東一

布政使

萬觀

夏寅

陳振

劉士奇

叅政

王晏

陳士啟

左璫

謝騫

李崙

熊桂

張潛

王玪

史學

敖璠

任環

馮敏功

叅議

賈恪

張繼孟

劉寯

按察使

石渠

副使

周鑑

張孟兼

彭勗

鄭敬

王和

李惟聰

王臬

沈鍾

戴冠

羅循

韓廉

牛鸞

張鵬

陸鈇

李日章

吳嘉聰

呂高

溫如玉

張應治

僉事

胡子義

崔碧

李彬

劉時敷

楊璣

張嘉謨

李紀

王燁

趙勳

焦太史編輯國朝獻徵錄卷之九十五

山東一

布政使

山東左布政使萬公觀墓志銘 王直

公諱觀字經訓姓萬氏世為南昌人南昌之族萬為盛自五代以來多顯者公之曾祖德遠祖漢雄父偉皆不仕而皆以行誼重當時公自幼聰穎異常選為邑庠生登永樂辛丑進士第 太宗文皇帝欲老其才而用之俾歸進學尋召為福建道監察御史克謹憲度凡所治諸事無不當於理翕然稱為賢御史

朝廷嘉之以所居官贈其父而封母李爲太孺人且榮及其妻未幾陞嚴州知府嚴之民雖稱易治而亦有弗馴者七里礮聚漁舟數百艘晝則漁夜則肆剽竊行旅患之公乃下令凡十艘爲一甲各限以地使自相守有所鼠竊者必連坐能改過者俾安業如故不期月皆化爲良善水行露宿無復有警郡中多大山田少民貧公巡行勸課山有可耕者聽貧民耕鑿而俾富者助之民食以足郡學傾圮首出俸資率富民新作焉諸縣學舍有弊者亦脩葺之增廣生員躬自課勵學者亦爭奮以承公意由是舉於鄉會試於

禮部對策於大廷中魁選者相繼而出爲顯官

先生祠久廢公復作之置像其中求其後人居守奉祀事表節義恤孤寡歲造段匹多於他郡則請計民力爲準而減之遞運船多而過使少歲治船爲民病則請減其半地少蠶桑而絲稅多民弗便請以銀代輸猛虎爲害禱于神而虎斃居三載除弊興利無遺者及考績來京師吏部以聞詔賜誥命以寵之時天下郡守拜賜者僅三人公爲首母太孺人無恙迎至郡朝夕率婦子備物敬養焉後以憂去郡人奔詣上司乞留不果度公服除豫上章闕下願復得公

爲父母衢婺之民慕公者亦上章請之適有言平楊
要劇郡非萬某不可 詔遂以公知平陽會運歲款
公私皆匱公篤於事神恤民歲屢有獲流亡未歸先
是百工赴役京師者皆後期工部下有司遣人送之
械繫如罪人有死於道者公憫焉後再遣時召而諭
之曰爾以匠藝當赴役而自取譴累人以惡人待爾
故械繫以苦之今我以善人待爾去爾杻械令自往
爾能誠信奉令乎衆皆懽曰謹如教無一人敢後者
堯祠廢公奏請新之芝生於棟或歸美於公公曰吾
知脩祠而已芝非吾事也滿九年考績公卿交薦陞

山東右布政使下車七日卽出視民瘼野有蝗督有
司捕之且虔禱于神蝗遂息齊民素健訟牒訢填委
公閱其尤者自治之餘以委理問計日䟽決獄爲之
清陞左布政使山東地連北京會有虜警民大恐公
拊循慰諭日夜勞悴使且耕且守民賴以安然軍國
百需皆趨辦其應務尤難未幾公邁疾猶勤事不懈
踰兩月疾益甚貽書都御史洪公及諸同列曰觀不
幸不得相與僂力報 國家諸公慎自愛洪公等聞
之皆傷悼奔視問其所欲言公惟拱手曰永訣矣遂
卒無一語及私景泰元年十月也享年六十四

山東布政使司右布政使夏公寅傳

顧清

夏寅字時正後改字正夫華亭人幼而岐嶷有巨人志日記數百言稍長益肆力於學正統戊辰擢進士景泰初授南京吏部主事日取羣經及百家言讀之發爲文章淵閎與密脫去流俗自成一機軸聲稱蔚然由稽勲郎中拜江西按察副使專董學政其教以崇實學黜浮華爲本知人善鑒士經其賞拔者後多知名復文山祠葺白鹿書院修陶侃讀書臺以風勵後學江西人至今稱之陞浙江右叅政處州民有苦

疏徐
州臨
清爲
勢

虐政走聚山谷者招之不聽曰須夏叅政來乃可宥
檄至卽散還其家丙午進山東右布政敬簡以容愛
民節用有屬以興作者不聽曰勞而不怨乃可弘治
戊申二月卒年六十六寅平居以諸葛武侯范文正
文天祥自期待留心當世聞朝廷政令善喜形于色
或有他則不懌終日嘗䟽論國家之勢在離合合則
安離則土崩今兩京并建其勢宜常合以制天下徐
州地連山東饑饉無聊宜在賑恤臨濤乃南北咽喉
或暫梗焉爲害不小宜選大臣有望實者鎮守二邦
訓與屯田示天下形勢廷議是之爲出白金四萬兩

賑徐州命都御史賈俊鎮臨清吳中旱饑有司莫以
告寅授書巡撫發廩二十萬石糶十萬石三吳獲以
濟他所論列若文廟禮樂之數正風俗立紀綱崇文
化作人才之類皆切于政本雖不盡用識者韙之平
生誠心直道無黨無援自筮仕爲郎二十年爲副使
十六年未嘗以淹屈降志嘗謂人有三可惜此生不
學可惜此日閒過可惜此身一敗可惜世以爲名言
所著有紀行集備遺錄政監東游錄史詠等書並行
於世

山東右布政使陳公振墓志銘 張邦奇

公諱振字時起別號主靜世居鄆之半村祖諱均得
隱不仕考諱叙仁以公貴封文林郎河南道監察御
史母謝氏封孺人公生而靜慧成童遊郡學有聲成
化甲午領鄉薦辛丑登進士授知吳縣陞河南道監
察御史福建按察司副使遭父母及大母喪服闋復
除雲南副使陞陝西苑馬卿尋患風疾乞骸骨章已
在途會有命徙官遂以山東右布政使致仕公歷仕
幾三十年官至二品致政之日室廬翛然䟽糲僅給
家居足不踰戶閩口不及時事姻親舊故鮮接其面

如此者十有二年以正德庚辰二月二十日終于正寢爲吳縣政平訟清門無私謁爲御史綜理畿內馬政巡按江西山東皆著風采然不以語人親故莫得聞其詳所上章疏子弟不及見其草單言而危行好勝者莫與之爭明於界分以法度自防絲毫必執無少假借于家于官截如也而心迹不二始終不渝忤且嫉者無所投其釁逆瑾竊柄方面而下以事之京者多執贄其門不肖者希恩澤而賢者祈脫禍公起家艱赴部貧無以贄謹惡其獨不往懷之未有以發也既復除雲南備邊寇煽亂設策冒矢石折首獲醜南徵肅清瑾索繳無處而公且益顯乃得遷苑馬卿

山東右布政劉士奇

順德縣志

劉士奇者龍江人也字邦正舉進士主事刑部錦衣千戶陶淳枉法殺人言官請逮治不問士奇再請竟法之轉員外郎議禮與諸臣伏闕哭諫杖不死遷郎中山陝兩藩與有司訟奉命臨訊論如法出守梧州梧州有關之征軍饑委輸時有奇羨士奇不爲利民多竹舍失火延燒輒數十百家士奇患之表火道度數家障以崇墉災乃止在郡七年超拜廣西左叅政江西按察使有某甲者一家九人文致強盜幽囚數年士奇鞠而釋之右布政山東以病乞骸骨歸

士奇廉家無餘貲或傳士奇常欲市蜺問其妻妻曰
何不書清字與之杜門八年卒

叅政

叅政王公晏傳

陳道

公諱晏字士寧鳳陽府盱眙人父諱成甫母葛氏當
元季隱處鄉間安貧履善用能免于亂世公生而
岐嶷不凡稍長勵志問學不苟言動儼如成人我
太祖高皇帝選天下俊秀儲太學公以通詩經預列
旣緣親老得告侍養之暇行業滋益用薦者拔縣學
訓導教人多有成就連丁二親喪洪武二十九年改
洛陽典史公持廉秉直不隕穫于權勢有中貴因事
過邑欲有徵求陵鑠吏民頗急公諭以理法勿聽廉

得其私裝將檢盤之其人歛謝以去河南司憲者以
其才能薦乃陞滋陽知縣公益自砥礪勞心愛人如
不及時憐邑有蝗爲災公齋戒禱天蝗不入境內
太宗皇帝御極之明年山東叅政戚公䟽公治狀遂
陞刑部郎中公執法平允獄無冤滯尋調儀曹被命
之江西督造海艘公嚴于統攝綜理有法用能集事
財費且減十之二三 上巡守北京時東宮監國公
一日當封稱旨每召見輒賜太官酒饌未幾陞陝西
布政司叅政布政使嘗宴僚佐用聲伎爲樂公止之
不可乘間而出已而事聞連及于公與凡在坐者悉

繫京師法曹按治間俄有

內批特宥公復任

東

駕召諭之曰汝第去我意汝無他頃爲 上前陳之
且其受知可謂深矣公在陝撫治民瘼弗亟催科以
秋糧後期左遷山西叅議滿九載始陞山東右叅政
時永樂二十年也公嘗督開運河濱岸有梁山泊者
在勝國時塋垣皆甃以巨石公悉取造梁庄諸閘其
事者初有難色公曰此非名賢其事不經無補風教
今先務爲急吾知紓民力耳遑卹其他耶公之謀事
向方而敢于爲義此類可見時擬公將有大拜適
仁宗皇帝在位踰年而上賓故未蒙倚用 宣宗皇

帝繼統又五年公七旬有四矣乃乞骸骨歸鄉里無
幾終正寢公歷仕四朝餘五十年冰蘖之操有如一
日不蓄侍妾嘗言酒色財三者吾自保無惑所不能
排遣者氣耳然公之氣亦非世俗挾私以求勝者其
爲兩邑所至民德之如父母每去任則挽留不忍舍
至解脫衣靴以寓甘棠之愛嘗以先茔在八仙臺下
弗能日時展省命工繪卷置行篋暇輒披閱之其孝
思誠切如此

山東布政使司右叅政陳君士啓墓志銘

楊士奇

陳之先五代時大理評事諱暉自金陵徙秦和始爲
秦和人自宋以來子孫蕃盛皆儒爲詩禮鉅族代
有仕者由科目進者六十有一人而至士啓士啓諱
雷旣以字行遂別字震之其曾祖文瑞元瑞金縣儒
學訓導祖存道安遠縣儒學訓導父煥章號萍翁母
蕭氏萍翁四子伯士瞻洪武壬子鄉貢進士興寧主
簿仲士悅叔卽士啟季士勗士啟髫鬣時已挺特克
自樹立甫十歲從學興寧君習詩律已文采英發十

二習舉子業治易經與朋友論議能自立說不蹈襲
未冠鄉大姓延教家塾前輩與之辯析史傳寡所推
讓父坐累謫遼東中道喪其從者士啟聞之徒步走
萬里省侍歲餘置居室及共養百需咸備奉命歸侍
母及左士悅理家事時公府徃役悉論產之殷者陳
氏產在里中甲乙數士啟雖年少兄弟協力一心必
不肯墮人後時興寧亦坐累謫五溪治裝遣人東西
寧父兄者嘗接迹而奉母盡孝養既父兄皆代歸無
幾父卒終喪永樂元年興賢 詔下邑大夫舉士啟
遂選中江西鄉試明年中禮部會試廷試 賜進士

出身觀政左軍都督府時成國公掌府事得士啟歡
甚間暇輒就講論古大臣賢將所以事君使人之道
士啟亦樂爲盡誠禮遇加厚召入翰林爲庶吉士脩
永樂大典辯博明敏同列推其老成翰林編修周
言于 朝陳士啟才行有爲有守超擢禮部祠祭郎
中授奉議大夫究習典章謹于職事呂震爲尚書屬
官諂附者率得近尹昌隆不爲諂附以罪去之卒擠
以死同列以是惴惴士啟獨任直道不苟徇或舉尹
戒之荅曰人各有命吾恭勤於職以聽命耳枉已媚
人以求容不能也呂雖惡之卒不能害丁內艱去服

闕還舊職無幾陞山東布政司右叅政士啟寬厚愛
民於事必盡心而襟宇闊達不察察以爲明不苛急
以責效待下常采其所能而舍其小過妖婦唐賽兒
惑衆爲亂坐失覺逮繫數月釋復職數行所部督徃
賦不嚴期約民得自便故事集而不擾青州歲歉郡
具饑民之數 上聞 朝廷遣使偕士啟如數賑之
粟比至而饑民之數倍增使者再議奏俟報士啟曰
民命在旦夕若再奏俟報旬浹間餒死多矣請發奏
卽出粟脫有罪請自任不敢以累遂獨具奏 朝廷
從之所至民有爭訟郡邑未決而伏馬首以訴者從

容數語理論之皆帖服三載考最 賜誥命授中大
夫高煦潛謀不軌稍覺士啟適至青州聞之暮夜馳
歸語三司同具密奏罪人旣得士啟從陽武侯兵部
尚書錄其餘黨撫安人民遂同御史給事中清理山
東諸郡軍藉之其姦者無所容枉者賴以直蓋爲人
果確爲政廉平循理而行無所矯拂未嘗務名而所
至其民愛之平居友于兄弟睦於親族處人和易愈
久而不變宣德六年八月卒于官春秋六十有六

山東叅政左公璚墓志銘

倪謙

公諱璚字世瑄姓左氏世爲江右南城宦族以明經
中永樂甲午鄉試登戊戌進士第觀政都察院辛丑
拜浙江道監察御史壬寅丁父憂起復改湖廣道正
統戊午陞廣東左叅議景泰辛未九載秩滿陞山東
左叅政癸酉以目疾乞致仕天順戊寅得疾終于家
公少聰悟好學甫七歲補郡庠弟子員成童母嬰疾
陷危徒跣走禱于華蓋山比歿哀慟柴毀旣冠從鄉
先生御史聶宗尹受春秋經先生見其端厚穎敏曰
此吾鮑宣也以女妻之父嘗患背疽時年八十衆醫

莫療公已出仕喪耦適以續姻還乃禱于天願以身
代忽遇遠醫至療之獲愈人以爲孝感爲御史時嘗
奉命按治陝西平反寃滯繩糾貪墨風采甚著代還
受勅命進階文林郎封贈父母及室時都御史顧公
佐總憲臺綱振威望獨器待公凡疑獄難決者必以
屬之尋督處州銀冶趨利者衆恒弄兵爭敘公痛繩
以法莫敢犯嘗有虎爲民害公捕絕之復奉勅考
察浙江官吏激濁揚清旌良斥暴輿論允愜其在廣
東時清理軍政姦僞莫售嘗往瓊屋招諭黎徒悉聽
約束漳潮寇發公以兵擒亂者者罪之餘皆釋去廣

寇黃蕭養勢日猖獗公卽率兵還討又往廣西徵
造船以禦之寇平與有功績滿復受誥命進階大中
大夫封贈如制其在山東時總督民賦公徵輸有藝
賦足而民悅甫二載謝事去其居鄉里比歲荐饑公
發粟以濟全活者甚衆鄉人德之公寬裕仁讓和易
可親以清約自持不爲斬絕之行歷官中外幾四十
稔所至興利除害惠澤在人每思世人飾誇辭而寡
實行因號訥菴以自厲所著有訥菴稿辭旨溫醇務
於析理又嘗編次晦菴刪定古文孝經及春秋旨要
藏於家春秋七十曾祖諱明叔元三公府從事祖諱

彬卿平樂州學正父諱彥彰贈監察御史廣東叅議
氏累贈恭人

右叅政謝騫傳

謝騫字鵬舉孚之子器宇軒豁自幼警敏刻志問學
衆以大器期之正統戊午補郡庠生尋領鄉薦登進
士第拜河南道監察御史侃侃立朝務持大體督
察鹽課于浙江風紀大振無敢私販者有冢宰子弟
怙勢犯之悉置於法併劾罷其官君子壯之時處州
盜起奉朝命躬入賊巢諭散其黨與徐策擒其酋
獻一方遂寧有文綺寶鑑之賜陞從六品俸尋陞漳
州知府至則以興學禮賢擊強暴束吏胥爲務復嚴
立保伍法責保首月報所轄生業及出以某事歸以

某時苟通番爲邏者所獲卽保首併四隣坐罪郡乃無事考績爲八郡最屬邑并隣封官僚軍民恐遷去郡赴部使者乞留之至五千八百餘人丁內艱轉保定知府嚴明果決吏畏民懷作興學校士風聿變陞山東布政司右叅政益感激奮勵誓竭忠真凡疑獄艱務悉斷之釐之無不當人意者誥進中憲大夫以疾力乞致仕歸恒持禮法自重非公事官府無一迹日惟借親朋陶情於山水之間暇則携子孫栽花種竹以增園林之勝而已弘治壬子以疾終于正寢壽七十有七

大中大夫山東布政司左叅政靜菴李公崧墓表

張弘道

公諱崧字世瞻別號靜菴臨潼人高祖德曾祖昇昇生祖思忠思忠徙居咸寧生父某以公貴累贈中憲大夫母張氏贈恭人以正統甲子九月生公卒弘治甲子六月享年六十有一公生有穎資年十八克西安府學廩膳生文詞勃勃莫之敢並大爲郡守余肅敏公所重嘗贈以詩曾有向關中識白眉之句以書經中成化乙酉鄉試己丑進士初除山西屯留知縣屯留難治在圭文美法上欺官府下虐良善十數年

來獄訟錢糧皆出其手吏供使令官聽調發公至先
縛其主文按其奸弊得十餘人悉唾死而縣治始清
法令不擾強梁畏如神明良善親如父母在縣三年
一毫不取廉名四振官燭不點他可知矣至興學校
脩禮樂正風俗特婚娶治行爲天下第一陞戶部河
南司主事轉山西司員外郎郎中在部十二年除積
弊革奸猾錢穀出納一毫不爽一時居部者無出其
右名動京師陞瀘州府知府治瀘州如治屯畱而法
令稍寬詞訟兵甲錢穀無不克舉賑荒救饑所活萬
餘人民不憂旱蝗不入境立信馬之法定一鈔之賈

創河橋以免民溺廣積穀以備賑貸撫按交薦聲譽
赫赫陞河南布政司左參政去任之日婦女痛號百
姓遮道立碑頌德甲寅丁外艱居喪三年不出門戶
丙辰服闋復除山東布政司右參政未及丁繼母憂
復迴守制服闋將起而病作不起嗚呼惜哉公貌不
踰中人判大事決大疑重如泰山沛若江河有一介
不取之廉有萬方無敵之勇故近山銘公曰行不媿
影寢不媿衾近山與公同爲李介菴門人介菴關西
夫子也許襄毅亦嘗謂人曰人知李世瞻有伯夷之
清而不知有管仲之才當時以爲的論公於子不甚

教獨嚴擇女配人問之公曰人各有性心各有志非教所能強也強之不從則害天性矣女配不良終身怨焉故於平田既觀其行又試其藝曰公輔器也將來必大成遂以女妻之今果然矣人以此服其藻鑑云治道妻祖山東德府紀善田公銘於公爲姊夫嘗述公之良治道得聞焉故知公之詳而表公之切觀者幸勿與納賂而厚誣者同而弗信焉

山東左叅政熊公桂墓志銘

公名桂字世芳南昌之新建人也弘治戊午以書經舉於鄉已未進士明年以父喪去服除授大理寺左評事尋陞寺副寺正武宗初太監劉瑾用事以囋法繩下嘗倚詔條凡藏匿軍丁罪及隣佑五六家以肆羅織部屬承望風旨誣累嘗百數十人公建言詔令權宜惟一時可行祖宗成憲則百世當守乞母輕變枉致冤濫上是之由是得免者以萬計屠都御史欲殺一指揮非其罪公駁回五六次將聞于上乃止瑾逆謀敗露黨與洶洶大臣慮有變促成獄

法司多出入瑾門下者不無觀望駭愕失措莫敢先
發公毅然承之不終夕成招盡得奸逆之情其外應
凶焰如宸濠亦不肯以親王少諱也嘗治安化王獄
其夜不收三千人擬同謀併坐家口公曰同謀幾事
也株連三千人且及家口慘矣力與辨明所活不下
萬人任凡六載巨細務在平反大率類此庚午陞徽
州府知府在直隸號劇郡民剛好鬪公下車一以安
養休息爲已任期年而政通乃節縮浮費修橋梁興
學校表忠節於教化惓惓焉姚源鄰寇流劫婺源界
公焦勞于外多方禽禦徽得安堵治績燁然最東南
諸郡嘗得海翁紫陽書院舊址乃復于釋氏掄士學
行者唐臯鄭佐胡宗明鄭逮程旦戴鍊黃訓輩八十
餘人講道其中資以俸餘又買田千餘畝給祭祀及
來學者爲久遠計 國朝守令不握兵官軍又不得
擅調正統間設民壯爲守城計迄于成化又增添之
地方有警則徵發捕邏而有司驅邇又有不可勝言
者徼民甚苦之不肯就役公爲審下糧定顧役法至
今稱便時冗食日增內供白糧出蘇松常者勢不能
給諂諛聚斂之臣飛派於徼又方新 乾清宮取材
於徼當浙之半公委曲曰上司至於涕泣得減其半

以蘇民困任甫三載屢下詔書旌其賢能進秩中
憲大夫推恩父母皆特馳封滿六年丙子陞山東分
政徽民不忍其去境上咸樹碑以志思慕至山東分
守東兗道一夕河決泛曹州兵備吳副使忽驚斃公
晝夜馳數百里往視之水勢甚暴乃齋沐臨河祭告
黜貪酷官吏數人水遂少定得築塞之嘗謁闕里恠
祭器不稱王祀度所費可千金會民有發地窖得錢
數百斗來報計之適足用遂命工鑄造規制乃備戊
寅督運至京師貴人歲常包攬利入本色以便侵漁
公力言于上得納輕齋省費不下數萬山東人咸
頌之未幾奔太恭人喪宸濠憾公作劉瑾招狀發其
陰謀幸公去遣賊悉焚其居第年五十有八公神氣
秀發狀貌豐偉學見本領故剛大之氣經濟之才雖
甚韜襲終莫能自晦也惜乎未躋大位而不盡見其
設施豈數果有短長耶抑世道之有升降人固莫知
其然也公在大理有駁稿在徽有治徽大畧及平生
奏疏詩文號石崖稿若干卷藏于家

山東布政司左叅政張公潛墓志銘

王九思

公張氏諱潛字用昭自號曰東谷其先河南太康縣人也乃以徭戍隸籍陝西岷州衛曾祖諱文信贈右副都御史祖諱善封右副都御史父諱錦官至刑部尚書左侍郎侍郎公後徙秦州公復徙華州定居焉乃今爲華州人母淑人劉氏生五男而公爲長生而穎秀清瑩如玉甫八九歲能日記數千言口占詩對荅應如流稍長弄筆爲文輒吐奇語侍郎公送之學士西涯李公所從受尚書李公奇之甚蓋嘗語人曰

韓退之驚恠張童子不易得也乃今復有張童子也
成化丙午秋公十有五歲矣西赴鄉試不偶乃益淬
礪自負不凡弘治壬子邃菴楊公督學關中徧試諸
生謂關中有三才子蓋慶陽李獻吉洵陽張光世其
一公也其年秋三人同舉而獻吉發解云公再試禮
部而丙辰春自禮部入對 太廷俱在高第其年冬
授戶部山西司主事出納錢穀關節不通剔抉弊蠹
祁寒暑雨無少懈惰部尚書稱其廉能秩滿三載吏
部考其績上上未幾擢員外郎辛酉侍郎公告終公
解官歸塋三年之喪畢收禮部儀制司員外郎正德

丙寅

天子新卽位將幸太學例遣官往召衍聖及

孔顏孟三氏子孫會太學觀禮禮部以公應命乃獲
遊闕里觀孔林登太山以望東海爲平生之大快云
未幾擢精膳司郎中凡 朝廷大宴會及宴勞四夷
經畫節制禮無廢闕費絕侵漁是時劉瑾用事公深
用避匿踪跡不通或謂公曰公鄉人也不往且有禍
公笑而不答其卓立如此已巳冬擢廣平府知府廣
平附畿內四三年來權奸肆虐民不堪命乃畿內盜
起流劫郡邑不可撲滅公多方捍禦郡中賴以無事
既乃按行屬邑撫循安輯之省其財力均其徭賦黜

舞文之吏清久滯之獄申庠序之教興禮讓之俗郡
邑熙然治矣逾五年癸酉起擢山東左叅政是時工
部尚書無錫秦公爲布政使與公皆名士也相得甚
歡凡旬宣督餉之務相與諮議而後行人方冀其大
有爲也乃明年甲戌考察庶官有忌公者興萋菲之
譖公聞命浩然西歸曰自求無歟而已又明年乙亥
太淑人卒秦州公竭力營塋三年喪畢始徙華州居
之公風流蘊籍人也善吟咏工書華州山水佳勝足
以自娛又常往來武功與康先生游對客命酒談論
古今時出雅譚聽者灑然如臨浩月沐清風鄙
吝頓消弗自覺也乃僅五十五歲而卒惜哉

山東左叅政王公珙墓志銘

孟春

公姓王氏諱珙字邦器別號西溪世爲澤之陽城人
自幼厚重不凡長承庭訓習舉業補邑庠生聰穎過
人一時儒者咸推讓之累試不售公志益篤弘治戊
午以書經領山西鄉薦己未登進士試政刑部丁父
憂守制居喪哀痛踰禮服除授戶部湖廣清吏司主
事屢承差委臨清德州居庸通太等倉監督收放糧
斛所至夙弊一清軍民悅服司農卿鄆城侶公洪洞
韓公俱一時偉人少與可者咸以廉靜稱之三載考
最獲 恩典馳封如制丁卯太安人卒于宦邸公扶

樞憂回安葬先是公以不獲祿養父母爲歎入仕卽
迎養母太安人於京師曲盡孝敬母氏熙熙然享
天年終服闋陞刑部雲南司員外郎尋陞山東司郎
中時逆瑾擅權專尚嚴刻同僚多以酷暴逢迎公獨
持正不阿法司以平恕明允稱瑾惡之欲中傷未幾
公獨陞陝西按察司僉事時川陝用兵總督軍務左
都御史洪公累聞公賢能卽取軍前贊畫多致克捷
洪公甚重之瑾事敗調河南按察司僉事分巡汝寧
道值巨賊劉六等作亂擁衆數萬雲擾中州勢甚猙
獍逼近汝城人皆危懼况有宗藩在汝尤爲可慮

公殫心竭力爲捍衛之計乃集衆誓曰賊徒雖衆背
逆天道逆天者亡汝輩無懼也我奉命來守此邦死
生與汝輩共之千餘人大遭挫劫奔潰孤城賴以保
全宗藩獲免震驚衆欲慶功公曰賊雖挫魁首尚
在若不急請兵勦除非特汝城難保恐中原亦未可
保也遂密遣人具奏疏入天子震怒亟命將出師
屢致克捷雖曰官軍之力公調度之功居多公又廉
知賊黨趙秀爲汝人其母久禁獄中卽釋之秀聞知
感泣思報適賊首趙璠等七人與劉六等會兵秀急
走報公公督率部下官軍追襲一舍地盡皆擒獲并

金帛等物解送軍門節該湖河二省撫按總督軍務
左都御史彭公報云獨守孤城屢抗巨賊其功尤爲
可嘉等語時紀功官吳玉榮者意望納賄公曰竭力
圖報盡職也納賄要名欺罔也吾何敢欺耶時同事
將官皆蒙陞賞有差公止賞白金彩段銀牌等物以
旌其勞無怨尤意無何紀功官以賍敗公功雖不錄
大節愈張禦寇有碑後鑑有錄百官不能泯也甲戌
陞山東按察司副使整飭密雲等處兵備兼管永平
等衛所州縣屯田詞訟公盡心竭方爲之地方有賴
丙子薊州歲荒公發倉廩賑濟活數萬人時虜寇把

兒孫帥衆犯邊殺害叅將等官公同撫按鎮守等奉
命討平撫按憲臣交章論薦兩蒙綵幣白金之賜戊
寅復進山東布政司左叅政分守遼海東寧道公以
誠信撫之除奸革弊境內肅然時有海西夷人進貢
道經開原守將誣執爲賊盜撲殺報功 天子遣官
按覈公承勘摠實回奏撫鎮俱得罪公以剛正不撓
之氣遇事無所回互人多忌之公曰知進知退天之
道也吾以布衣致位三品腰金衣紫足矣遂解組以
歸公忠孝剛正本於天性傷父早逝常懷風木之悲
迎母宦邸曲盡孝敬之道今大冢宰襄垣劉公爲編

修時與公爲同年約諸縉紳皆以榮壽詩章爲賀處兄弟友愛篤至鄉人以孝友稱許又嘗創建祠堂以奉四代神主此尤其孝之大者退休林下十年杜門不出雖鄉飲盛典有司敦請辭謝不赴不爲人囑託公事有司自敬重之享年七十有五嗚呼若公者可謂生順死安烈士夫矣

山東左叅政史公學墓志銘

王鴻儒

正德六年盜起雄霸跳踉於河朔山東數千里承平日久所至莫敢嬰其鋒山東左叅政史公于時視河金鄉羣盜猝至公與僉事杜丙謀曰縣城卑不足恃以守徒死無益蓋退保濟寧集兵觀釁乃去金鄉入濟寧選調銳士七百餘人指授方畧出與賊遇多所擒斬兵勢以振會言路劾公等退避遠繫詔獄遂皆除名是時陷城比比後多蒙宥而公等獨得重坐蓋朝廷欲明軍法適會其時也八年春召二子謂曰吾年且六十數已盡矣函山乾原吾將營樂丘焉

子服闋復除本部郎中乙丑奉勅理漕事軍民咸
肅綱運不阻清戎京輦不避權近人爲公危之而公
自如正德丙寅陞四川布政司左叅議奉勅總理
邊儲丁卯以例裁革戊辰改福建庚午陞山東左叅
政未幾盜起而公坐貶焉公資稟和平溫粹樂善好
不言人過勤於問學本朝諸名家文集訪收無遺
文吏牘囚簿樂錄有關世道無不採摭當代
無不知與人交外無敬慢而中有親疎果其
身不渝處家孝敬勤儉旣歸課耕治田建始
先世祠堂續譜割常稔之田以供祭祖墓凡
數處各定以期仍志于石命宗人世守之其教子懼
失其良心恒置卧榻之側逮授室而後異寢蒞官二
十餘年廉介公勤如一日爲文渾厚博洽不事彫飾
所著有埭溪集二十卷金淵節孝錄溧陽人物記又
若干卷俱藏于家

修時與公爲同年約諸縉紳皆以榮壽詩章爲賀處
兄弟友愛篤至鄉人以孝友稱許又嘗創建祠堂以
奉四代神主此尤其孝之大者退休林下十年杜門
不出雖鄉飲盛典有司敦請辭謝不赴不爲人囑託
公事有司自敬重之享年七十有五嗚呼若公考可
謂生順死安烈丈夫矣

山東左叅政史公學墓志銘

王鴻儒

正德六年盜起雄霸跳踉於河朔山東數千里承平
日久所至莫敢嬰其鋒山東左叅政史公于時視河
金鄉羣盜猝至公與僉事杜丙謀曰縣城卑不足恃
以守徒死無益蓋退保濟寧集兵觀釁乃去金鄉入
濟寧選調銳士七百餘人指授方畧出與賊遇多所
擒斬兵勢以振會言路劾公等退避遠繫 詔獄遂
皆除名是時陷城比比後多蒙宥而公等獨得重坐
蓋 朝廷欲明軍法適會其時也八年春召二子謂
曰吾年且六十數已盡矣函山乾原吾將營樂丘焉

南陽士懋學吾友也今官南都爾爲我索墓志於懋學吾無恨矣二子驚曰大人何爲出此言公曰此常理古人亦有爲之者不足怪也夏四月十五日與客飲散登樓閱書忽疾作遂不起予聞而大驚與公交幾三十年中間離合不常自忝令命方期胥會以罄平生豈意公遽至於此公之先有諱崇者以功封溧陽侯子孫因家焉父墳以公貴封戶部郎中母沈氏封宜人公少岐嶷髫年賦詩落筆有奇語從兄文冕見而喜曰此吾家異日亢宗子也遂親授以經居六載文冕去世公感其識拔勵志於學時戴恭簡公提

學南畿一見以爲奇士成化丙午舉于鄉丁未中進士第弘治辛亥授戶部主事差典外廐芻牧尋同中官及臺諫勘侵地于南城近郊監漕通州檢甸服田災督儲淮陰一歲當代淮人上書借留從之丁巳陞本部員外郎戊午陞郎中奉勅總餉遼東時邊庾多虛悉心計度察近裏餘積役弛刑徒用轉般法漸以實邊又奏出京帑庫銀三萬餘兩多買粟豆積塞下爲備未幾虜大入軍賦有餘將土豪健虜不得志而遜己未三載考滿再受誥命父母與妻並受封焉是年聞父喪明年遭母喪宅憂五朞哀毀盡禮甲

子服闋復除本部郎中乙丑奉勅理漕事軍民咸
肅綱運不阻清戎京輦不避權近人爲公危之而公
自如正德丙寅陞四川布政司左叅議奉勅總理
邊儲丁卯以例裁革戊辰改福建庚午陞山東左叅
政未幾盜起而公坐貶焉公資稟和平溫粹樂善好
不言人過勤於問學本朝諸名家文集訪收無遺
文吏牘因簿樂錄有關世道無不採摭當代
無不知與人交外無敬慢而中有親疎果其
身不渝處家孝敬勤儉旣歸課耕治田建始
先世祠堂續譜割常稔之田以供祭祖墓凡
數處各定以期仍志于石命宗人世守之其教子懼
失其良心恒置卧榻之側逮授室而後異寢蒞官二
十餘年廉介公勤如一日爲文渾厚博洽不事彫飾
所著有埭溪集二十卷金淵節孝錄溧陽人物記
若干卷俱藏于家

山東布政使司左叅政敖公璿墓志銘

俞憲

古人定交以盛衰存亡爲節而敦本植倫之士必以此自考見云余自始進持服家居則聞浙中有恤刑而賢者爲郎中敖君及後上天官補刑部郎則又聞署中有恤刑而賢者爲郎中敖君時君因爲郎中恤刑浙中也余恨不及見旣君以恤刑竣事還署署中故事僚長貳自公見外壹以齒叙進退別坐而容色言語不免有所以長長貳貳者存乎其間君獨脫去凡習裏外一誠無所以長長貳貳者存乎其間以故

僚友多就之初君常物色余意或魁岸奇辟要眇闊
畧不可近而余以嘗知君故方傾心君君覘之積旬
日乃信余而定交也居三年君遷兵備副使去余亦
尋罹罪譴而君兵備太倉州太倉州與吳錫近邑往
來必過余其容色言語加于余者忘其爲遷人也余
亦自忘爲遷人與君上下議論握手嘆時事如在署
中時不意別且五年而君逝矣君居官穎達博裕而
不爲魁岸奇辟之行明潔貞毅而不爲要眇闊畧之
談所至能任大事持大體頗不爲浮俗是非利害所
奪初還署會言官論順天鄉試不公法當治無何又

有論甲辰榜大臣不當私其子者

天子屢下詔

其事君如詔會僚友按治之自侍從而下逮捕者凡
若干人中外恟恟有悸色中官莫測 上意又日令
徒校持手版旁記所按狀以待 上問諸曹有色動
者君按之自如也有詞臣不受訊者竟訊之有御史
不受繫者竟繫之諸所承伏悉具實以報報兩上
天子以爲平也悉是之茲役也以疑似得洗者先後
凡若干人觀於此而君之任大事持大體槩可一已
署中故清約至不能具茗供故事辦之莞庫者或因
而浸淫其費則莞庫者又因而尅取歲報之羨以克

君憤曰非法也且知其弊而逡巡之與自尅取等耳
乃禁而更與僚友約月出俸錢以給君于財利雖微
必慎如此君旣兵備太倉州不逾月州獄失守逸要
囚四十餘人入海且爲亂君不白當道亟發兵捕之
而海賊素馳突又倚新囚爲援勢張甚君旣撲滅之
不妄戮一人先是江防都御史嘗具疏請兵兵不及
發而平賊之疏上于是 天子嘉其功錫以金幣君
以非大賚賜不敢辭乃以幣衣其母而以金易田一
鍾用貽榮于其後人君按太倉州不專尚嚴而持法
一如署中念已有兄弟交訟者連數歲不能解君將
置之法其人聞之星馳數百金造君廬求君之弟而
浸漬焉弟乃厲聲叱之令亟去不去且縛于官其人
亟還因以告其鄉人而余親聞于其人者也嗚呼此
非操履素定卽吾心有不能自信者况兄弟乎又在
千百里外非啻暮夜抵門可以自決者也君之平生
於此可想見矣君諱璠字貴之自號蒙泉居士江西
臨江之新喻人

整飭蘇松兵備山東布政司右叅政兼副使

光祿寺卿任公環墓志銘

徐階

嘉靖癸丑倭夷寇東南于是時天下承平久吏與民不知有兵革賊至輒奔以潰復菴任公同知蘇州獨訓練所統民兵與力戰而躬介冑策馬以先之自書其姓名於腹背手足曰死戰吾責也雖然先人之遺體不可棄也茲用以識庶得收葬焉聞者咸感泣公又與其兵同寢食或連日夜粒米不入口或露宿草莽植立泥淖中未嘗稍自異所得俸直及諸上官之牢醴悉分與其兵由是兵亦日奮敗賊於上海之八

團方戰時寇拔劔擊公賴庖人某身蔽公以免公猶
被三創既而守太倉以積勞疽發于背公子爾孝請
公還郡就醫公叱曰吾誓不與賊俱生幸吾疾愈而
賊滅當與若共太平之福否則有臣死忠妻死節子
死孝而已歸以是語爾母吾不能與婦子對泣幃榻
間泯泯以沒也會報賊至公遂裹瘡出海繫之怒濤
如山南人習舟者皆震眩失色公意氣彌厲手劔麾
舟師擣之賊大敗俘斬百餘未幾又敗之陰沙敗之
保山敗之南沙人旌旆輒遁去捷聞擢山東
按察司僉事整

六備甲寅賊犯蘇民爭走入

城聚保而門鑰不得入民相抱號哭聲震原野公泣
曰城池視百姓重等耳柰何棄之亟命啟門而謂其
守曰賊入者某請任其責活十數萬人明日賊至以
計敗之葑門乙卯賊復大至復大敗之斬首六十餘
級 詔進公副使 賜白金文綺廕一子爲潞州衛
左所副千戶世襲丁母趙夫人憂部使者及諸士民
連䟽乞起公 詔責公大義而特贈公母爲孺人以
慰公公不得已受 命明年倭寇平䟽乞終制 詔
報可仍陞山東布政司叅政以旌其功又明年丁嫡
母張夫人憂海內士大夫方望公服闋出爲 國家

排大難立大功而公以前勞戍午疾作遽卒享年僅四十於是士大夫又莫不悲公用之未竟與朝廷之失士而蘇松之士民則相與爲祠祀公給事中蘇人徐師曾請於上贈公光祿寺卿然其父老猶相與言曰未足盡報公云公諱環字應乾復菴其號世爲潞安人曾祖增祖仕父翔以公貴贈文林郎滑縣知縣公生正德己卯幼警悟不凡年二十三舉山西庠子鄉試登甲辰進士知廣平以才優調沙河丁父憂改滑縣沙河當南北之衝疲於役甚公首爲省厨傳罷誅求以次釋冤獄毀淫祠凡所興革必視民所便沙民大悅其治滑如治沙語具二邑生祠記及德政之碑辛亥徵至京師公之族有與宗室婚者故以例佐蘇州配李氏先是公以其母壓於嫡不敢爲妻請封公歿爾孝以請始特封宜人子男二長卽爾孝郡庠生次爾節今襲千戶公爲學先行誼尚名檢始爲諸生時大書壁間曰營私者無上虧行者無親又曰充海闊天高之量養先憂後樂之心必如是始可以言士故其歷官清真介特迥然異於時流而忠義之績在蘇松者尤著

山東左叅政馮公敏功傳

王世貞

馮公者其官山東布政使司左叅政也而治漕事卒而贈太僕寺卿予誥尋以公滿叅政考贈祖父爲大中大夫亦予大夫誥叅政法不當贈贈法不當得誥而今得贈及予誥者漕河南告成 天子大推恩任事臣獨公最久而前後功又最高以卒故惜之甚其被恩澤有大臣所不敢望者嗚呼馮公可謂遇矣公諱敏功字元卿其先居海鹽改隸平湖已而徙郭中遂爲平湖人王父遂平令俊父汝弼舉進士授行人擢工科給事中以直諫謫婁更大邑令晉守吾太倉

再晉揚州同守中單辭罷以公考最封按察副使得
贈如公階者也公生而明穎通古今文籍十六補邑
諸生十八從其父太倉與諸生雋異若凌尚書雲翼
徐太僕曠憲副敦張憲副大韶相切劘爲制科業而
不佞真忝公同齒叅其末公是時秀眉美姿馳筆而
長鶩毋能當者還爲諸生試輒冠其曹偶廩學宮然
大試輒不利時揚州公已謝事歸而治生又以其羨
贍宗黨公一切佐之三十始舉其鄉第三人上公車
報罷亡何島寇來迫平湖前是平湖城矣徃徃多資
公力而至是復佐其令憑城爲備禦計甚詳寇去而

有授兵乘間爲虔劉者令以爲倭也懼甚公授甲家
衆夜坐立睥睨間直明而辨兵乃愧退鄉人辟亂入
城城人虞不給時臬使方按部中謬傳且逐之羣咻
使所公聞而徃以片言折之解當是時微公幾叵測
凡三上公車乃見收射策高第明年授禮部祠祭主
事 詔選良家子充後宮公在行獨不擾坐主拜相
者所親道士以公役騷擾道路公伺其歸而責答之
相怒甚召公詬曰若不知我門下客而答者何也公
正色曰答橫道士耳不答師門下客也卽答師門下
客而爲師少懲橫者以爲弟子罪未敢聞命相頗盡

赤然竟未有以中也尋進主客員外郎奉 莊皇帝
卽位詔而南道遷其司郎中還遷江西布政司右叅
議分守南康九江部公行部至南豐而濶兵調者以
餉不足方大掠公召其長好謂曰而與我鄉人也故
爲而言一反手間名爲賊 天子檄大軍至虿粉矣
餉不足吾爲若治餉其長悅公乃料倉粟庫鏹次第
屬於舟而使一郡作導之選精勇尾之咸懾不敢動
屬方議均田而公所部多山高下饒瘠異狀公使善
計算者周行阡陌間計畝受稅毋得伏匿又爲之平
亭其役畱籍南康未三歲以才舉拜山東按察副使

飭徐州兵備兼治漕河甫至而河決睢寧繇白浪
而入青陽决者六皆巨新安左右决者七差小其水
不制睢寧之陸滙爲湖曹口而上故河百餘里以南
盡爲陸淤泥半之漕艘之阻者數千計漂廬舍人畜
無算公甫至受計大吏謂士民晝夜併作與其下分
功任難無何决塞各就緒漕舟漸通而大風雨彌旬
水暴漲諸塞盡潰湖與河一來攻邳公時按部邳下
令土其門水勢重不能禦公卽解衣裙囊沙而塞之
諸從官吏率市人爭效公圍沙皆滿水逡巡解公乃
行視諸决口皆就塞僅月餘而水復漲敗閭家口以

西半戈山左右堤百餘丈公又築之自是隄土漸堅實不受侵矣會徐州靈璧諸邑舊堤潰公又受計大吏所獨治者南自曲頭抵青田八十里北自陸灣至呂梁四十里所與監司曹郎合治者直河以下南岸幾千丈又自茶城喻華戚山曹築單堤一百六十里以遙衛漕河之閘者諸經畫版築榘木薪土之費與護視斥堠約束惟公行之最精監司曹郎咸取則焉公素壯盛當其治河時往來寒暑無間黧瘠胼胝見者莫辨識始遷河南左叅政公於職不專治河而其地與事亦故相關撫按臣聞而喜曰吾可高枕矣而

少年喜事者欲從泃口穿葛墟微赤良城等山抵南北大湖中界兩長堤爲運道以示奇徵公與議且屬之公念諸山道約二百餘里多礮石礮砂不易鑿大湖相連十四不易隄民力之幾何而費用之持不可乃寢而喜事者意未已別欲繇海通膠河其視漕稍徑而中皆高嶺巨石東土瘠人疲不勝役甫舉事而驚潰者再矣乃移公山東公議以膠工不易興且不

易竟卽竟亦終塞縣官故不乏金錢柰何悉捐以填無用而勤此數十萬人力也撫按臣采公議以聞時柄相獨擅國前後授指於喜事者怒而下書切責人

或爲公危曰內意堅且實才公以治河顯而弗以治
河終之禍且及公公嘆曰吾豈不念禍爲國家計重
耳堅不可奪遂舍公他屬卒如公言費至十三萬金
而無尺寸利柄相稍恣沮用廷議罷之然猶謂人馮
叅沮洳今又沮膠者何也懲昔鞅掌故倦耶公尋歸
職職所治稅糧時久已困不給爲平亭其額募墾荒
土流民占籍者萬計已而念楊州公老病乞休歸朝
夕侍湯藥楊州公得公而喜爲加餐亾何竟卒始公
失其母屠淑人戚不廢易已失繼母徐淑人易不廢
戚然皆在壯時體猶爲之柴瘦而楊州公用老壽被
服金紫極園池亭榭之樂其卒也公親視含歛虞祭
當塋日送舟千艘人無憾而公業五十餘矣孺慕益
篤雞骨支牀幾不起服除久之薦者相屬乃從田間
起仍故官改佐漕運公時苦宿痾未平人或難之公
奮曰賴上恩得治私今不以爲不肖而屬之大寄
吾何忍負且嚮者親身也親已背矣身當爲朝廷有
遂冒暑抵淮淮之南故有邵伯寶應高郵三湖相連
爲巨浸漕舟過者往往多漂溺因議濬內河通之御
史大夫王公廷瞻疏上得請而公至任其艱巨者與
比部羅君共治公於河事故心通而役者皆習公能

工以大集公益不愛其精力水陸奔走且旁治賦訟
覽訊譟輒至丙夜不休五鼓卽起以爲恒尋馳督漕
舟自徐而濟凡七晝夜遂昏曠不復省已而稍蘇還
進醫藥微効復出勉治事病寢劇見其婦曹與子相
對泣猶呵曰人孰無死吾幸獲以勤事死何恨叩之
家事張目不答而趣羅君至曰內河成於國計甚利
第太逼湖湖善潰而隄薄萬一如瓠子數百里魚鱉
矣幸爲別創堤衛之已而顧其子曰吾死死必有賻
女却而歸諸官羅君色慘沮謂公堤吾職也母足多
慮若子幼何以語我我爲任之公徐曰有家弟在羅
君別而公以萬曆乙酉季夏望日之午整衣冠端坐
而逝春秋甫六十子一卽伯禮補邑諸生以枕文著
公性孝友楊州公嘗卒邁盜公已冒鋒刃而出之愛
其弟敏効尤篤事相師產相讓也與楊州公俱善治
生而至饒乃能以義散施不吝平湖之人至今感稱
公父子

弇州生曰馮公所謂能捍大菑禦大患者非耶淮之
人相卒而祠祀之也公於居官它功績甚多不志志
其治河者於國不爲利則抗悍相棄其官而不之惜
利則鞠躬盡瘁至死而不爲已真純臣哉玄冥之勤

官而水死何以異也乃國家之報勞臣厚於汲昌而
薄於王延世蓋哀之矣

君別而公以萬曆乙酉季夏望日之午整衣冠端坐
而逝春秋甫六十子一卽伯禮補邑諸生以稅文著
公性孝友楊州公嘗卒邁盜公已冒鋒刃而出之愛
其弟敏効尤篤事相師產相讓也與楊州公俱善治
生而至饒乃能以義散施不吝平湖之人至今感稱
公父子

弇州生曰馮公所謂能捍大菑禦大患者非耶淮之
人相卒而祠祀之也公於居官它功績甚多不志志
其治河者於國不爲利則抗悍相棄其官而不之惜
利則鞠躬盡瘁至死而不爲己真純臣哉玄冥之勤

官而水死何以異也乃國家之報勞臣厚於汲昌而薄於王延世蓋衷之矣

叅議

山東叅議賈公恪傳

附子定

祥符文獻志

公諱恪字惟恭別號林居子開封之通許人寓居祥符高祖堅宋河源令曾祖思忠元臨洺鎮巡檢祖贊國初鉛山令父麒封陝西道御史公自幼穎敏越人初名鷺提學憲副歐陽公哲見而奇之更今名自聖塾選補邑庠生刻意問學雖嚴冬盛暑手不釋卷正統戊午領河南鄉試第二名明年登進士第授行人將命四方人皆偉其才丙寅選授陝西道監察御

史丁卯刷山西文卷自三司以及郡縣凡匿卷者皆
被劾治罪官吏懾服已巳勅理浙江銀課時處州寇
發嚴設備禦民賴以安奉 命巡按浙江薦能廉
鋤奸頑洗冤澤物克張其職景泰辛未蒙 恩封其
父如已官母妻俱孺人是歲冬丁內外艱服除改江
西道兼攝廣東道事乙亥巡按宣府與屯田練軍旅
凡安邊之事皆悉心力為之不懈既代歸適

英廟復位慎選老成分任方岳 命京職各舉所知
東魯許襄敏公彬為翰林素知公賢乃以薦擢山東
布政司右叅議召至 便殿宣諭 德意賜寶鏹千

員為道里費公懷惕厲以求報稱戊寅兼理遼陽邊
餉癸未督修闕里林廟具有成績 先是公按宣府
曾劾奏僉都御史李公秉由是有隙成化丙戌秩將
滿會秉當銓曹考察遂坐以不謹放歸田里或為公
不平公笑曰行藏有命何係於彼乃浩然歸汴與鄉
耆致仕都御史婁公良鄭公寧方伯丘公陵張公斌
叅政楊公鐸副使劉公安僉事呂公益和公維輩結
社賦詩為樂夏則往遊通許別墅避炎歊優游林下
者十年餘乙未八月卒壽六十有八
子定字仲一別號一菴叅議公之仲子也幼耽書有

自得之趣弱冠就鄉試主司閱其文動目然卒迷於
鑒別歸結委心亭劬書不倦成化辛卯舉鄉薦乙未
丁外艱戊戌登進士第庚子出刺絳州絳人有屠者
偕侶遠出拉諸谷中殺之將私其妻不可又殺之乃
鬻其女以逃事久不明公根株其實誅屠者辛丑大
饑疫公參酌古今爲救荒八事行之悉驗總賑少司
寇何公喬新大加稱賞下其八事於列郡利濟甚博
晉地宜棗約絳人饑不得伐棗棗熟饑者仰之何公
始入疆問曰絳棗何以獨完民曰使君有約弗忍違
耳垣曲絳屬邑有寇聚山澤公乘其新合 健徒雪

夜急擣之獲其魁復從平陽太守李公琮入山撫甘
餘黨悉委仗卽農初饑民棄子女轉死溝壑日遣人
伺諸途聚而養之凡所活數百巡按御史宋公德閱
視各有餅餌在握歎曰民之父母固如是已弘治戊
申丁內艱歸暇日編輯守令政規庚戌復除易州易
多山近畿 內養薪蒸所出經樵百年山童林空公
爲立良法民以不罷永樂初始建北都民有獻棗栗
者久之歲以爲常乃列園林登耗之狀以聞得減其
半甲寅以考最擢山西按察司僉事適巡撫都御史
張公敷華訪時政公曰如高平繫逋薪直者田業已

盡淹械園土中永無出期不若通簡邑民物其丁產
稍殷者俾十分出一分償之又欲令州邑簡其民淑
憲之泰甚者識以善惡二籍歲終則勾稽其實而誅
又言山西統屬視他省爲少而晉代藩封國在
一日滋祿徵無極彼解澤晉寶與穀同利三藩
益併鹽粟均輸爲便多見採錄丁巳正月公卒
得年五十有一

叅議張繼子孟傳

張少參公繼孟字子醇公以禮部儀制司郎中陞山
東布政司叅議年未五十致政歸居林下家徒四壁
立居旁建茅屋三楹鑿池爲橋植竹數竿扁爲一笑
亭日觴咏其中禁足不出客至第肅至階送亦不出
門卽朝貴枉訪止折柬相答于勢利紛華泊如也嘗
言作人須要有趣對俗客嗒然無一語遇學士大人
有道術者與之譚說名理揚權風雅疊疊不倦令人
灑然不能遽別前輩一時如西涯相公蒲汀尚書皆
海內宿望常聯輿過訪公或畱坐所共脫粟之飯間

出蔬果盃酒三五巡卽止諸老宿自公第出輒喜見眉宇相謂曰吾儕遇張子醇一飯勝倍別家盛筵矣其爲人愛重如此楊方伯守魯旣第筮仕揚州府推官瀕行候謁請教公謂曰只要做得人好不論做官做得人好時充軍也得爲民也得夫當後生筮仕初卽爲此厲語不爲忌諱楊公亦終身佩之不嗔爲不吉語古道如此年八十卒卒之日至無以爲殮其子以訃聞於諸同年在京宦者得贈若干金始克襄事云

山東叅議華巖劉公寯墓志

吳朝議

公諱寯字振道別號華巖生而穎異在提抱中人已知其不凡長就外傳明詩經精舉子業弘治壬戌遊邑庠正德丁卯與兄孟齋公寯同領鄉薦越甲戌登進士第明年授徽州祁門知縣部民程氏有辟獄已成公訪知其寃翻成案力請兩院脫之養馬之家有強梁奪其驢者成顛疾公得其情追而還之顛遂愈孺學久乏科第或謂學前民房參差官舍傾圮使然公則以學校爲首善之地士類所聚遂捐俸改葺民苦坐派解外軍需公蒞任切如痍瘝在身卽爲白當

道征爲稍緩流寇接境委官領義兵遇之賊間道趨
近壤公奮臂率民兵扼要害擒渠魁數十餘黨悉遁
散士民爲立碑婺源令缺當道更公署其事婺民歡
迎祈民遮泣已卯陞南京刑部陝西司主事庚辰轉
南京兵部車駕司員外嘉靖改元轉南京刑部河南
司郎中獄多平反欽天監天文生貧富家有貢緣奪
其業者禮部大堂允之郎中賀公縉執法牒公公亦
如法斷忤大堂意致禮刑二部上疏下三法司議卒
如公所擬朝議大禮上疏爭論執政不能破其說丙
戌陞山東布政司叅議分守遼東千戶哈英罹罪公
誠心體訪知其寃竟活之由此忤世謝事百姓詣察
院擊門保留不能及直道難容公又何愧焉時公年
正強脫然林泉且曰孝友乎家是亦爲政日與兄弟
色養太孺人楊逾十年楊卒公居喪哀毀至襄事一
思一語及太孺人輒涕泗潛然自是角巾私第不入
公門暇則著書立言摠發其平生識見所著有潛夫
一班集行于世

按察使

山東按察使石公渠傳

潘埴

石公渠字翰卿別號天全道人世爲泰州人祖希永
高邑令改掌山陽縣學教遂占籍清河縣卜居淮之
清江浦公穎敏超卓剛毅老成舉成化乙酉南畿鄉
試登丙戌進士擢刑部主事遷員外郎平允守瀋陞
山東按察司僉事分巡遼海東寧道兼管糧儲遼陽
倉糧腐爛者半首按究官吏奏黜爲民州衛貪婪者
聞風落膽有改行自新者卽加獎籍以勸其進人皆
感服在遼陽數年撫卹官軍禁革奸弊邊境賴以安

堵擢本司副使改巡他道一日郊行遙見人影出沒
林木中近復不見命部卒搜叢林中得頂包僧十餘
人解其包有物在焉鞫問之昨宿尼寺殺商人而奪
其貨驗尸賊皆伏辜奏毀其寺尼配諸鰥夫癸卯山
東大饑奉巡撫牟都御史檄齎銀五萬兩糴穀江南
太平府渡楊子江風浪大作舟幾覆人皆號泣公歔
神色不變焚香祝曰此行爲救數百萬民命渠何足
惜神其鑒之言未旣風浪頓息載穀而歸上下胥慶
分賑饑民賴以全活未幾陞本司按察使審核重囚
日有平反察舉貪廉憲體直肅雖老吏進呈文移惴
惴焉莫敢仰視黜姦猾舞文者數輩令行禁止丁未
會朝 覲考察主其事者頗有宿憾必欲置之散地
先期有聞遂拂衣而歸置萬柳莊奉二親正德丙寅
恩詔進階一級病卒年七十一

虞徵金

卷之九十五

五



